

頤  
道  
堂  
詩  
選

頤道堂詩選卷十九

錢

阮公樓呈雲臺師樓在雷

雷陂綠水漲平蕪小駐旌旂此墓廬松徑秋風嘶石馬草  
堂夜月夢珠湖謁

陵詩入朝天集籌海功深益地圖記取阮公樓上語  
恩深未敢乞菰蒲

瀛舟篇

阮雲臺宮保師總督百粵登沙角礮臺閱水師畢  
卽乘兵船過零丁外洋看大嶺山望老萬山回澳  
門閱香山兵因題船額曰瀛舟師昔撫浙籌海署

池上小亭曰瀛舟遂使醜類殄平全海底定今復  
乘風破浪親歷區畫宣德布威遠夷懾伏洵偉績  
也謹賦此詩

兩浙瀛舟昔籌海燕寢清香凝劍鎧神風盪寇靖餘艤中  
夜丹忱鑒真宰百粵瀛舟今籌邊黃頭百道橫戈船伏波  
下瀨展雄畧威行海外西南天天空海濶帆飛渡龍驤萬  
斛凌雲去大崙山碧萬山青蛟螭拜伏魚龍護海門浩蕩  
軍門開晴雷百道乘風來橫簫直遂奏夷樂焚香遠迓雲  
帆回夷舶奏夷  
樂迎瀛舟澳門樓閣香山樹海舶雲屯通市處夢到  
釣天鬚未華瀛舟兩字揮毫畧身到瀛舟竟渡瀛廿年節  
鉞寄專征夜闌閒話雷塘雨更憶琅嬛刻燭情曼雲吟館

羣英集刻燭琅嬛同草檄通侯銅印外國書墨痕狼籍煙

雲濕可惜軍中作奏人祇餘殘字湖祠壁

節署瀛舟額曼生所書師還

朝以額移白公祠小亭上

三沙十激海雲秋我亦瀛洲憶

曼生下世已數月矣故云舊遊二十四番浮海路仙槎亦署小瀛舟

余備篆崇明往來渡海二十餘

次署所乘舟曰小瀛舟

### 隋宮瓦歌和雲臺師作

不見隋宮人但見隋宮瓦翠甌一角閱千年得自隋宮廢  
基下阿廢昔日平江南城郭犁盡軍聲酣三閣飛灰六宮  
燼更無片瓦餘江潭龍舟殿脚來廣陵中原兵火方飛騰  
九宮祇餘一瓦在流珠往事悲填膺君不見銅雀瓦魏宮  
三臺覆玉顏漳河流水日東瀉歌吹凝望西陵田又不見

香姜瓦辛苦高家晉陽土執樂萬指紅粧紅青雀飛來化  
鸚鵡此瓦零落今千年蕪城夜月埋寒煙六朝往事互憑  
弔案頭亦有陳宮磚

原作

阮元

隋宮黃土迷蕪城大雷小雷春草生玉鈎金釵掘已盡  
荒原還有耕夫耕我過蕪城見耕者拾得隋時故宫瓦  
但有雙環四出紋惜無文字周迴寫回鴈宮芳林門知  
是何方簷溜痕流珠堂成象殿建瓴形勢分明見一規  
翠顚閱千年祇宜琢就圓池硯麝煤響榻寫隋書護兒  
先錄來家傳

東陵聖母祠

後漢書郡國志廣陵有東陵亭時有女子杜姜左  
道通神縣以爲妖閉獄桎梏卒變形莫知所極以  
狀上因以其處爲廟是曰東陵聖母太平寰宇記  
云在江都縣南三十里萬歷江都縣志云在城東  
蔡家庄元大德五年重建阮雲臺師禹貢東陵考  
以東陵卽廣陵自合淝水由巢湖入江合淝地勢  
平行至滁州清流關近江爲陵之中江都東及泰  
州爲委過淝水詩所云禹貢東陵爾雅收清流關  
直到揚州請看淝北淮南路此是東陵西起頭並  
引東陵亭及此祠爲証

玉座青苔黯畫裙神弦恍惚奏橫汾相公簪筆晨祈雨

韓魏

公有聖母西陽雜俎云東陵聖母廟女道士康紫霞於夢得仙人謂廟祈雨文侍女焚香夜夢雲之仙女後因立廟祀今仙女廟是也在揚州東北三十里待種瓊花祠富媼誰將茉莉謚元君分明禹貢東陵路更證研經阮氏文

### 奉陪雲臺師遊焦山

萬樹參天起中流湧翠屏闌橫半江白門對數峯青清梵流松閣殘碑冷鶴銘題名紀巖石姓氏亦仙靈

### 焦山觀周南仲鼎漢定陶鼎

甲戌格周廟丙子烝圖室司徒佐宣治厥效弗頗側琬戟姬鸞旂及彤矢縞鞞對揚敬丕顯王命作女錫子孫永寶用世惠紀史冊銘詞深奧篆書亦猶文密南仲見周雅中興懋成績鑄此作周簋用享厥考烈我昔遊辟雍手拓岐

陽石與此點畫同科斗互盤屈何年入祇林付汝舍利弗  
今我觀雲雷溫潤過璆玕因知傳世古不受土花蝕考證  
凡幾家徐勣顧炎武程遠汪琬鄒儀周緒峻六家各有釋文玩此釋文釋更觀定陶  
鼎曾度慮僂尺踰糜其陶陵琅嬛辨欵識神物各千秋摩  
挲增太息案頭習鼎文更憶婁東畢習鼎舊藏畢秋帆尚得其拓本  
撥勒之石

### 焦公祠題壁

翠屏壁立鎖江烟聞昔焦公隱此間一樣開山有成例金

山也合號裴山

金山只唐裴公開山得金故名

樵山更說譙山戍

古稱樵山亦名譙山寰宇記通典皆有譙山戍

恰使焦公獨擅

名靜卧瓜廬對寒雪隱君心跡比江清



中郎

蔡邕作贊

高士

見皇甫謐逸士傳

遺文在元寂棲遲正渥丹一代

高名重東漢焦山終古並嚴灘

不言妙諦師黃老祇聽江流日夜聲四十七年鑽石透此

中更有傅先生

見真誥舊志云石室在瘞鶴巖下晉傅先生隱處

訪瘞鶴銘殘碑

山中曾過華陽居江上又見華陽書華陽仙人去已久一  
銘留重茲山隅茲山昔日焦公住洞口古苔封綠樹幾行  
仙篆瘞仙禽我來還訪書銘處丹楊仙尉嗟何人斧山徵  
士誰所親仙心縹緲入寥廓橫江東去凌秋雲我昨夢入  
華陽山采藥親見仙人還滿地松花落松影一鶴閒立松  
陰間逸少眞書知者寡鶴壽不知其紀也他年來訪上皇

樵茲山我亦題名者

戲集瘞鶴銘字題瘞鶴銘

錢塘管筠洲玉女史

逸士瘞仙禽藏之有篆銘山前徵此石江表立茲亭冥  
化留眞紀華詞著相經寥天方換序吾亦欲書扁

江上望松寥山書太白詩後

太白焦山望松寥山詩云石壁望松寥宛然在碧  
霄安得五綵虹駕天作長橋仙人如愛我舉手來  
相招按松寥山乃焦山之餘支東出爲二小峯亦  
在江中又名海門山舊名海門關唐時稱松寥夷  
山孟浩然詩夷山對海濱指此俗以松寥分屬兩  
山者誤山形甚小不足以供登眺不知太白何以

如此傾寫也

昔聞松寥名今見松寥面松寥兩拳石浮江露葱蒨近脉  
接焦阜遠勢引淮甸橫笛弄高秋題名借僧院山名應已  
古太白詩中見石壁玩水松寥天映江練懷望碧霄人長  
橋綵虹綯

松寥閣

橫簷上松寥松風響午潮青山江隔岸黃葉樹前朝僧梵  
閒齋磬詩情寄酒瓢何年來借榻塵夢與全消

東冷泉

我本西冷人來酌東冷泉東冷泉味好澹泊全其天何必  
學中冷綆汲沉深淵

登焦山絕頂四而佛亭眺望

危闌天半橫飛樓一螺海國春潮浮南雲北雲幾家雨東  
風西風何處舟目力及者渺千里胸次曠然懷九州青天  
白雲好光景重來更與凌高秋

焦山絕頂望金山不見金碧惟見蒼翠亦如金山之  
望焦山也因悟宮保師地毬月輪之說詩以紀之

金山望焦山一螺浮海國焦山望金山亦祇蒼翠色焦山  
山包寺金山寺包山管蠡笑目論論在眉睫間一亭西吸  
江一亭東吞海豈知一微塵各自有真宰須彌納芥子世  
界生蓮花空香禮華嚴妙義參楞伽因之悟地毬遠望月  
輪小月中若有人視地亦殊渺八溟一杯水五嶽幾卷石

登高賦六合長嘯海天碧

借菴上人丈室觀張寶厓烟江疊嶂畫幀用蘇詩韻  
年來飽看江南山水氣蒼潤生雲烟江流無聲帆影峭  
隱靜對心悠然近山結綠遠浮翠此中知有佳林泉匡廬  
懸瀑湘浦雨長林絕壁縈清川畫手頗似蕭尺木芙蓉萬  
疊森我前孤亭突兀似浮玉危闌曲處橫江天修蛾澹掃  
寫平遠明鏡翠黛生嬌妍溪山佳處結茆屋安得十畝梅  
花田半生羈宦滯江海得遂初服知何年寶厓畫筆古摩  
詰雲飛水動殊娟娟借公亦是卧遊者容我借榻僧廬眠  
登高南眺指黃鶴山中之人仙乎仙畫裏看山山亦畫是  
真是幻參因緣鷲嶺迢迢鶴渚遠招隱更誦歸來篇

謁楊忠愍公祠並書墨蹟後

椒山遊焦山楊子渡揚子姓氏生因緣因種緣亦起公來  
作遊客題詠匹流峙公去爲忠臣乾坤振綱紀此間有祠  
廟白日虛堂啟我昔過公宅松筠賸遺趾

京師松筠菴公故宅也

今

來拜公宇江山翼階祀遺墨矧完好寶氣燭青史更憶天

山成題詩照江水

卷中洪雅存太史詩最佳

水晶菴

水晶宮未到此地水晶菴雲影澄虛白江光浸蔚藍夢涼  
僧借榻境淨佛同龕有約看秋月無波證古潭

自然菴

境閒心亦閒疑佛復疑仙鶴壽不知紀松寥各有緣鐘聲

答雲水帆影入江烟笑語東林長吾生任自然

書藏

又闢藏書地樓臺湧刹那鶴銘移楮墨

余擬摹瘞鶴銘焦山書藏四字爲額

焦字以樵字之半當之

龍藏共烟蘿流派江河遠叢殘歲月多西湖

靈隱寺七錄憶卷阿

靈隱書藏亦師所建

巨公厓贈巨超上人

洪厓題壁處

洪稚存太史所題

來訪巨公厓禪定潮平檻詩成月

滿階天花飄白衲海雪踏青鞵一卷弁山集微吟坐小齋

乞借菴隙地營棲雲閣先之以詩

我本山中雲因風落人間去住隨所之天水相與閒行雲

思故山臨風商去住松下數間屋稱我幽棲處宦海不可

泊故鄉未得歸隨地有名山棲息無是非此間山水佳江  
光入寥廓佳處留茅菴坡公有成約佳處在何所漢祠今  
海西擬向借菴借遂我棲雲樓松寥惜無松更向菴前種  
夜深江月來疎陰澹秋夢

曼兄爲巨超上人書偈云焦山近東海正好借菴住  
但須立腳牢不怕隨流去禪理甚深筆亦奇偉擬鐫  
之巨公厓側

老住茲山有盛名曼公偈語亦金經摩厓便是寒陵石留  
伴華陽瘞鶴銘

### 江上送別

百感付題襟諒公同此心輕帆定風利別緒與江深



聖意方籌海民情正望霖應知

丹陛訓益以勵中忱

自焦山還至瓜步用東坡自金山放舟至焦山韻

我欲跨鶴尋蘇耽橘井遠隔清湘南不若近訪焦處士京  
峴正對青山三東望圖關西句曲黛影高下眠春蠶金山  
明靚乏蒼翠面此曠逸應懷慚芳春佳遊惜未到翠屏一  
角桃花潭盛夏暄暑亦頗勝萬綠蔽嶺穠陰酣斷碑剝蝕  
雙鼎煥古物頗足資清談椒山祠屋矧新建百家著錄珍  
書龕僧廚作供蔬飯飽東泠煮茗清泉甘鏡江亭高話秋  
月重遊有約應非貪雙峯勝處勒厓石壁窠作字吾猶堪  
南屏山色忽相憶得歸便欲營茆菴

秋夜玩月書寄借菴

松影如畫松竹影如畫竹月華若澄水浸此一庭綠涼風  
從西來蕩漾生微縠枕琴進碧雲冰絃憂秋玉瞻念山中  
人秋氣森蘿屋

題葉芭生林屋探奇圖

金山與焦山江上兩浮玉

焦山亦名浮玉

遊屐一再過登覽快心

目爾家居莫釐翠嶂好巖谷西望縹緲峯輕艫探林屋林  
屋古有名奇處在山腹潛行出江底云可達巴蜀一從隔  
凡隔遂爾謝塵俗江左兩洞天其一爲句曲華陽與左神  
名在列仙錄吾宦刊江濱爾僑武邱麓吾欲借爾遊何年  
遂初服來叩龍威丈乞借素書讀一帙訪兩山繼此金焦

圖畫裏且題詩仙夢煙嵐綠

月夜琴趣

明河斜帶青松陰碧雲半罨青松林松際雲開見涼月月  
華正照無絃琴禪悅仙心參妙悟無絃之琴得琴趣滿庭  
松影荇藻浮一角石牀涼瀉露我生亦是無懷民北窻高  
卧羲皇人焦山之遊未攜爾江天八表思停雲松寥閣上  
留君住月波臺畔抽帆處夢逐松風一送君扁舟應過瀟  
湘去

翁君桐隱旣歸秣陵辱承懷念以余字雲伯也寫覽  
雲懷舊圖以寄意感而題之

蔣山秋色我思君揚州明月君憶我憶我便望南飛雲日

向雨花臺畔坐臺高遠望長江流白雲片片飛清秋秋風  
起兮波嫋嫋雲亦因風飛縹緲雲行恰向君家停君亦與  
雲同此情君來還向雲邊住雲亦與君有同趣雲來雲去  
雲不知碧天日暮勞相思詩成拂袖君歸矣悵望烟江三  
百里白雲無心亦有心隨君飛渡烟江水

謙谷以所畜天台猿放之焦山作詩送之

爾本天台上生支公攜爾渡江行

吳僧雲  
峯攜來

今番送爾焦

山去且向空江嘯月明

好向山僧夜聽經意中江上一峯青他年倘伴華陽鶴仙  
尉應勞更立銘

月夜玩小庭松影

月底松陰不可掃秋水空明橫蒼藻涼露欲下松風鳴露  
蟲滿地皆秋聲何處高樓夜吹簫歛盡浮雲月華白夜深  
人靜玉輪西滿地松陰上東壁

題郭蘭池臨管夫人墨竹並修竹賦卷

一叢瘦綠橫秋蕪鷗波盡竹蘭池暮風枝雨葉各有態扁  
舟夢入瀟湘漁卷首更書修竹賦書法便娟託細素筆陣  
應過衛茂漪美女登臺仙嘯樹臨本風姿媚烟篠定識蘭  
亭真本好松雪齋中風雨生蓮花莊外烟雲掃提刀君說  
吳興賢我謂此言殊未然管公柔翰自神妙六宮珍重千  
秋傳后代書經妃代詔趙家往事聞高廟玉臺何必遜青  
箱比肩翰墨原相肖我亦閨中有仲姬

余姬管氏  
亦字仲姬  
簪毫粗

解盡書詩雨中新種窗前竹補壁還勞寫一枝

夜起禱雨見月

天晴望快雨天雨望好月禱雨深夜起殘月光未沒清陰  
滿虛廊松影細如髮陰蟲鳴始繁微風吹漸歇月夜不覺  
涼更慮日午暍農家車水勞晝夜輓轆活淮南米價高不  
雨達吳越占星仰雲漢私幸月離畢滌慮對明神清晨肅  
掘謁所冀三日霖田水鳴汨汨無月亦復佳新涼蘇病骨  
六月二十一日爲宋歐陽文忠公生日同人集桃花  
菴設祀並奉伊墨卿太守栗主移配三賢賦詩紀事  
遺愛應知繼謝公廣陵宦績數文忠平分一席惟坡老此  
地千秋屬醉翁春茗自留詩卷碧晚荷還傍酒樽紅雪堂

有約梅花放更奏南飛鶴唳空

十二月十九日東坡生日同人更約設祀

國朝人望數漁洋聞道汀州亦老蒼鶴返秋林仙伴侶

君

官攜鶴歸

犢歸春野古循良

君在任歲歉民皆賣牛君捐廉收養春耕還之農民賴焉

百年觴詠鶯花地一代風騷翰墨場詩卷長留書法美精靈同契水雲鄉

湖上草堂觀荷

夢繞翠屏明鏡裏一角曉涼三十里家在荷花世界中鷺  
冷鷗閒呼不起烟中柔櫓搖清香泊舟湖上登草堂畫橋  
幾處碧陰合闌干一角花中央水繞闌干花繞寺荷葉參  
差綠無際一雙白鷺破烟飛清露明霞漾涼翠回首茆堂  
舊水扉藕花香隱釣魚磯西湖烟雨南湖月每到花開便

憶歸

和曾賓谷齏使蜀岡感舊

平岡低枕曲江涯白石三生夢九華詩勒名山珍玉帶路  
經仙觀問瓊花禪邀北秀譚宗乘香蕪南豐禮大家我是  
浮沉海漚鳥又聽仙樂奏頻伽

原作

曾燠

扁舟復到水雲涯兩岸人言鬢有華司馬當年栽柳樹  
劉郎此日認桃花彭城舊客雖重會洛下名園尙幾家  
省得見恒河性在波斯唯願證楞伽

送玉徽歸金陵

聞道清湘放棹回月明江上美人來關河烟雨銷琴軫兒



女悲歡感鏡臺白露涼初秋澹蕩碧雲天半夜徘徊移家  
畢竟青溪好桃葉桃根傍水栽

夜起玩月有懷

珠斗闌干帳女牛夜殘河影漸西流五更澹月斜連曉一  
院陰蟲碎併秋清露香疎花滿徑微雲涼動水明樓玉人  
又作烟江別聞笛青溪一種愁

喜借菴上人見過

上人共秋至涼意滿衣襟得句有禪味詠詩皆梵音潮聲  
孤舫遠竹影小庭深更語華陽鶴殘碑試一臨

余案頭有舊拓瘞鶴

銘全文上人乞借摹勒石

揚關署中古銀杏相傳是東晉永和十年種王簣山

觀察繪圖索題

虞山古銀杏長蔭巫咸祠攝山古銀杏亦傍棲霞碑遠或  
千載近亦數百載根株盤屈枝離奇此樹不知何代種突  
兀孫枝任梁棟生平老樹見頗多漢柏唐槐應伯仲夢寐  
恍惚知生年三國以後六代前摩挲定識謝安石惜無右  
軍一序得與蘭亭傳東武先生擅風雅日日吟詩坐其下  
悵望千秋讀史心不是尋常樵關者壽高榦老若有神灑  
落淮雨停江雲我來賦詩譽嘉樹盤桓似對齊梁人嗚呼  
世間古物埋蒼蘚不過才人名不顯千秋當作召公棠留  
與詩人歌勿翦

寶女墩在召伯埭楚家舖北相傳爲隋宮人塚疑卽

煬帝美人袁寶兒也

召伯湖邊問楚家，尚餘香塚葬盤鴉。  
纖腰碧鞵長隄柳，笑靨紅愁野岸花。  
芳草已無銅輦跡，春泥可是玉鈎斜。  
蜀岡南去雷塘路，菊秀蘭芳弔九華。

署齋老槐枝幹奇古千年物也詩以詠之

大業垂楊久作薪，法雲雙檜亦成塵。  
尚餘蜷曲輪囷樹，亦似支離兀傲人。  
風雪空山宜老壽，鶯花官閣亦長春。  
空廊宛轉虛堂靜，消受清陰日幾巡。

前詩旣成客有言槐卽古玉樹者引三輔黃圖及甘泉賦爲證因以玉樹名堂且爲之詩

昔年曾讀甘泉賦，今日蒔葱詠此堂。  
嘉樹應知譽賓客，清

芬何止頌文章芝蘭奕葉須培養松桂喬林共老蒼寄語  
謝庭諸子弟好將風度比琳琅

秋夜聽湘姬鼓琴

斜漢低垂掩斷雲琴心清遠韻清新  
瑟從斐几疎簾畔如坐幽林古澗濱  
夜色霽空微有露月華滿地靜無塵  
拊絃欲譜思歸引一曲梅花寄早春

秋夜觀星書寄琅嬛

天上有日月其次爲星辰星辰定何物  
吾意亦月輪月輪與地近星辰與地遠  
人在地毬中聰明塞混沌我今夜玩月  
還復觀衆星月光若明鏡星光若流螢  
譬之畫觀物愈近則愈瞭又如夜觀燈  
愈遠則愈渺因知近星者見星若

見月中亦有山川中亦有人物更思遠月者見月若見星  
倘逢晦及朔一粒青冥冥 本朝西法精窺天見天質不  
知空虛中地球幾千百道家堯率宮佛說恒河沙似誕實  
非誕有涯仍無涯一星一明月一毬一世界作詩寄琅嬛  
高談六合外

英灣別墅同石谷上人放生池觀魚

幾分秋色上疎楊潭影微波澹夕陽游侶無端合江海清  
談有味悟濠梁眼前魚樂機同活塵外鷗盟夢未忘回首  
南屏山下路故鄉亦是水雲鄉

吳園小憩

隔江凝黛晚蒼蒼閣道低徊轉曲廊松影和煙盡空壁蘿

陰帶雨濕虛堂莎邊蛩語朱闌墮蘋外鷗波盡檻涼舊是  
翠華臨幸地苔花分綠上宮牆

江上晚泊

晚煙城郭畫南徐兩點金焦落照虛樓閣影空疎樹外江  
山秋遠暮潮初尋僧蕭寺聊題壁把酒篷窗快讀書我是  
風塵倦游客何年沈約賦郊居

題邵夢餘大令鏡西閣詩集

蘭渚雲門路幾重詩人家在翠微中鑑湖一角容狂客快  
閣三層住放翁名士文章希有鳥男兒身世可憐蟲祇今  
澹墨殘處珠斗高寒耿碧空

廿年蹤跡感名場宦海煙波亦渺茫寒士求官虛入洛才

人失志例浮湘小紅低唱悲春女太白高情赦夜郎何處  
吟魂最淒戀六朝山色在斜陽

前夕銀河昨夜星秦淮水碧蔣山青微波桃葉春人舫細  
雨梅花水部廳十指拂箋燈畔寫雙鬟橫遂月中聽秣陵  
新詠分明在我亦游仙夢未醒

載酒元亭幾度遊崔盧門閤誼曹劉客來南郭尋高隱人  
憶東陵說故侯觴詠蕭閒頻對月湖山清曠最宜秋焚香  
諷後然脂寫江左詩壇第一流

玉樹堂月夜聽俞秋圃琵琶彈海青夕陽簫鼓玉樹  
後庭花諸曲並出琵琶譜及同人贈詩乞余作序詩  
以贈之

素月入戶明西堂桂花流影窺東廊  
俞生載月渡江至爲我法曲彈清商  
一彈海東青雲中撲鳴雁朔風吹冷  
軒轅臺燕山雪花大於片彷彿烏桓  
塞上遊名王玉帳頭驚讌移宮換羽  
翻新腔似從雪塞移煙江夕陽簫鼓  
漾流水蘭情玉語嬌無雙舊遊殘夢  
一千里吳門畫舫秦淮雙坐我玉樹  
堂更彈玉樹曲玉樹流光照後庭桂  
宮美人皎如玉我昨泛棹青溪遊燕  
支井冷臺城秋後庭花開復花落更  
無商女彈箜篌十年我向江南住聽  
汝琵琶凡幾度華亭明月蘇臺樹酒  
邊飽聽新聲處流珠宛轉停湘絃燭  
花紅暈當風圓自惜生平抱絕技名  
流海內投詩篇檀槽解作琵琶語烏  
絲還有琵琶譜一卷新書乞我傳排  
當細向燈



前數月殿雲階事渺茫屬君更爲譜霓裳普菴咒是婆羅  
引元白當年最擅長玉砌無聲珠露重小庭影澹成秋夢  
月華和影照青琴冰絃更作梅花弄

聽琵琶之次夕月明如畫花影滿庭秋圃爲余鼓琴  
奏梅花三弄鶴舞洞天海鷗忘機三曲詩以記事

酒人雜坐秋聲裏廣庭明月涼如水一片宮商動古愁琵琶聲斷琴聲起一弄梅蕊含朝陽再弄梅幹凌繁霜三弄聲聲傲冰雪冰絃皆作梅花香彈到梅花香在手吟煞梅花香在口獨抱孤山一片心喚來老鶴柴門守柴門煙鎖深復深鶴夢祇繞梅花林洞天福地渺何處璫璫舞態招仙禽梅賦宋廣平鶴賦鮑明遠指下秋心絃外音一角家

山舊蒼巘別有閒情寄海鷗青蘆夜雨白蘋秋廿年宦海  
浮蹤在一樣忘機溯舊遊養成白鶴親教舞南歸應卜梅  
花嶼更營水榭待盟鷗抱琴飽聽西冷雨

夕陽簫鼓曲

琴語無聲箏語歇晚天凝黛山銜日何處繁聲動遠空畫  
船彷彿煙中出憶昨秦淮問板橋垂楊水榭木蘭橈霓裳  
奏罷銷春雨玉樹歌殘送暮潮吳娘水閣更番憶山塘七  
里鶯花地對影聞聲最可憐生平多少銷魂事經年拄笏  
領邗江花外紅樓隱畫舫何處流珠歌水調誰家金粉掩  
疎窗我家舊住西湖曲湖上春來柳絲綠嬉春士女踏青  
遊鏡裏清歌人似玉幾度檀槽響碧紗幾回銀甲撥紅牙

鳳簫吹暖尊前酒，羯鼓催開葉底花。  
鼓聲急促簫聲緩，餘韻泠泠漾鶯管。  
紅樓珠箔上華燈，林梢一抹殘霞晚。  
舊夢初回酒半醒，銅絃鈿軸響瓏玲。  
煩君更奏新翻曲，簫鼓還從月下聽。

觀漲

彷彿天台渡石橋，分明雪瀑卷冰綃。  
西來半是河源雪，去秋塞外雪甚大東下應添海角潮。  
鴻雁哀音何處集，蛟鼉駭浪幾時消。  
一編五壩籌河議，祇此涓埃答聖朝。

影園是黎遂球詠黃牡丹處

影園明鄭元勳別業，當集名流詠園中黃牡丹以

粵東黎遂球詩爲第一製金觥贈之稱黃牡丹狀  
元遂球字美周後殉桂王之難

詩壇當日盛筵開解賦名花識俊才太白曾邀妃子賞牡丹親見狀元來誰雕碧玉爲花葉合鑄黃金作酒杯今日影園空有影病梨斜日掩蒼苔

蜀岡訪春貢亭遺址是北宋貢茶處

清泉蟹眼魚眼黃封龍團鳳團何處舊時春貢蒼苔亭角  
闌干

歐公壁間賦茗坡老試院煎茶應是此間佳種色香葉葉  
新芽

泉品何妨第五花枝况近無雙更約山僧種茗茗花開傍

幽窗

龍井夙稱禁地鳳城曾試頭綱他日西湖歸隱竹爐松院  
斜陽

湘姬選余詩爲摘句圖爲題一律

辛苦雕蟲媿未工賞音珍重感絲桐選從玉鏡粧臺畔寫  
向銀鐙畫閣中掩篋定勞紅袖拂開函應勝碧紗籠衍波  
箋紙簪花字消受溫香護綺櫳

張寶崖爲余畫京口諸山各題一首

蒜山

蒜山在城西二里或云吳周瑜與蜀諸葛亮議拒  
曹操於此籌算故曰算山唐陸龜蒙詩周郎計策

清宵定曹操樓船白晝灰南唐烈祖嘗遊蒜山除  
地爲廣場編虎皮爲大幄率下會於此蘇東坡詩  
蒜山幸有閒田地著此無家一房客觀此則山下  
舊寬廣可容萬人似不止今西津渡口孤峯而已  
然則銀山玉山皆古蒜山也

蔥嶺本無蔥蒜山亦無蒜割據紆鐔策遺跡冷江岸征吳  
百萬軍寂寞消一算

### 金山

金山在城西七里大江中名金鼇峯唐裴頭陀挂  
錫於此建伽藍於水際獲金數鎰以聞明皇賜名  
金山梁書天監四年帝臨金山修水陸會則金山

之名不始於唐矣山之西有中泠泉石排山山上  
有郭璞墓

樓觀湧江心下俯蛟龍淵水陸修法會往事聞梁年何不  
名裴山古洞橫秋煙

### 焦山

焦山在城東九里大江中名樵山與金山並峙相  
距十里亦稱雙峯後漢焦光隱此故名山之餘支  
東出爲二小峯曰松寥或稱海門關卽華嚴經善  
財參海雲處三詔洞瘞鶴銘鑽丹石石屋存焉

善財參海雲華嚴譯音義東下海門關松寥隱嵐翠昨訪  
焦公巖思營十笏地

石公山

石公山在城北九里瀕江與焦山對峙山形如雙  
象一曰象山山巖有洞二下有普賢庵竹木蕭疎  
人跡罕至

瀕瀕大如象瞿塘不可上香象欲渡河萬馬共奔放更憶  
縹緲峯具區發漁唱

洞庭西山亦有石公山

北固山

北固山在郡城治後一名北顧上卽甘露寺南史  
所謂京城之西別嶺入江三面臨水者也山後石  
壁廣數十丈峻峭險峙下臨江潭另峙一峯高聳  
突兀名石帆峯旁綫路陡仄爲走馬礮相傳漢昭



烈走馬處山前唐李衛公鐵塔孤撐雲表狠石鐵  
鏤久亡

蕭家北顧樓近在南徐郭三面臨大江絕壁勢如削鉄塔  
撐孤雲天風響檐鐸

圖山

圖山在城東北六十里與五峯山相連宋張世傑  
與元兵戰於江中不利退奔圖山卽此山尾插入  
江心其幽邃處爲虎洞長江千里瀉入胸懷爲邑  
東勝覽

韓王與張公忠義畱兩間浩浩黃天蕩寂寂圖山關江流  
一萬里東下何時還

日精山

日精山在府儒學內上有光風霽月亭山後古松百餘株山前老梅修竹城市山林也南眺西南諸山北俛大江爲城中極佳處左之譙樓卽古之芙蓉樓也

松陰沉古墻梅英下芳甸城市有山林光風澹如扇東指芙蓉樓題詩送辛漸

月華山

月華山在府治西晉刺史王恭初建萬歲樓於其上至唐猶存唐人多題詠之宋初呼爲月臺又曰月觀下有秦潭秦始皇鑿陸龜蒙詩松門穿戴寺

荷逕遶秦潭今堙

戴寺穿松門秦潭遶荷徑我登月華山定有月華映沈吟  
太白詩霞想飛天鏡

夾山

夾山在城南十里東晉法安大師始建寺焉唐禪  
僧夾山於此說法寺名竹林今四方雲游參訪之  
徒棲息於茲者寒蒸勿輟渡江第一叢林也

牛首開法融棲霞剏法度夾山古城南安公築錫處古佛  
靜無言坐對前朝樹

招隱山

招隱山在城南七里宋處士戴仲若高隱處後其

女捨宅爲僧院梁昭明太子嘗讀書於此石案猶  
存唐李衛公於此賞玉蘂花玉蘂亭址及詩刻尙  
存虎跑鹿跑二泉泉味極佳遊人於茲瀹茗焉  
昔過招隱寺曾訪戴公家更詠芳春樹唐時玉蘂花沈吟  
小山賦高致緬孤霞

### 黃鶴山

黃鶴山在城南三里一名鴻鵠南朝宋武帝微時  
游息於此有黃鶴飛舞其上故名南史戴仲若世  
居剡中徙居京口止黃鶴山下宋文帝欲見之曰  
吾東巡當宴戴公山下又名戴公山下有鶴林寺  
唐馬素禪師道場也前有宋米芾衣冠墓米公自

云死後爲寺伽藍旁卽戴公女磨笄處曰磨笄山  
黃鶴山前樹曾看黃鶴來一從黃鶴去落葉下秋苔高詠  
懷崔顥沈吟日幾回

迴龍山

迴龍山在城南七里下有八公巖林壑幽邃俗呼  
內監爲公梁武帝太子讀書於招隱寺有八內監  
隨之太子歿八人乃隱蹟焚修於此有庵八曰翠  
淙曰潮音曰紫竹曰深雲曰半壑曰大林曰遠塵  
曰化城後又建庵二曰漢隱曰平等寺康熙三十  
八年

賜八公洞額

淮南八公山江南八公洞

天章被雲日古今相伯仲空山讀書處遺文溯蕭統

五州山

五州山在城西三十里相傳山絕頂望見五州故名梁武帝臨幸輦道猶存梁時有寺至宋元祐中蘇右丞頌請爲功德院遂名因勝蘇學士軾題山半亭曰臥看滄江

九州大無外五州亦不小蒼苔繡石礎蕭梁餘輦道雲臥看滄江決背下飛鳥

西山

西山在城西六十里如論山高驪隨船曹王香山

長山之屬羣峯環拱叢雜幽深好事之士以負僻  
無從搜討遂置之不論然風雪渡江蓬窗對之殊  
有千峯競秀之勢故以殿諸圖後

東下江流遠青山直向西萬峯青不斷遠與碧天低前路  
尋句曲征程信馬蹄

題金壇吳曉仙女史

附臣

花卉畫冊

鐵崖弟子曹比玉西河弟子徐昭華隨園十三女弟子英  
英玉立皆名花金壇仙人好門第家近華陽隱山翠一函  
畫冊百花薰肯向花前親執贄絕代才名寫韻軒天寒翠  
袖感江村無雙玉女真名士第一金釵畫狀元我是詞壇  
後來者一門兒女耽風雅子婦明詩近已刊

子婦汪端明  
三十家詩選

刊刻

告成姬人小集會親寫

姬人管筠小鵝波館詩手定付梓

兩鬢霜華感百

端六朝裙屐寄盤桓門牆不種閒桃李弟子於今有采鸞

曉仙就余問字故詩中云爾

### 真州道中勘河作

淮南司馬問何如辛苦真同上水魚不共桓寬理鹽筴翻  
從賈讓治河渠夜燈梅樹三更後春水桃花二月初更與  
農田籌水利白沙翠竹話耕漁

### 湘靈峯歌

在真州西郭外明汪氏榮園舊物今園池盡廢此  
石獨立於野田荒隴間高二丈許下銳上豐洞穴  
百餘生平所見奇石此爲第一舊名美人石阮雲



臺尚書師爲易今名並鐫湘靈峯三字於上

生平未泛湘江篷眼前忽見湘靈峯煙霧杳靄翠鬟彈疑  
采沅芷窺衡松湘雲兮湘雨羌美人兮久延佇捐予佩兮  
澧浦悵獨立兮誰語渺含睇兮湘君桂旗芝蓋兮湘夫人  
荒園憔悴感今昔彷彿澤畔悲靈均讀書解頌湘纍橘靈  
壁仇池非爾匹夜深江上一峯青夢遊來聽湘靈瑟

眞州準提菴宋返魂梅花歌

十年不作羅浮夢晚向江干踏春凍萬橫香雪爲我開一  
樹冰霜問誰種昔日離魂今返魂柴門寂寞臥枯根蒼荒  
蘚老何年事元氣昏回一夜溫此事由來最奇絕起向花  
前弄寒碧絕代芳魂若有人翠羽啁啾訴殘雪魂之去兮

幾何年知爲古衲爲飛仙抑爲才人之曠逸與美人之嬋  
娟三生白石舊時月可曾與我相周旋我亦江南詠梅客  
宦海蒼茫閒不得東閣新吟倚鳳簫西溪舊隱思漁蓑魂  
歸來兮楚靈均梅之精兮江采蘋如禪寂後再出世如仙  
化後重登真或言此梅栽北宋定與歐蘇相伯仲無雙亭  
榭護瓊花何事湘纍閒楚頌倩女何須感斷腸此花真有  
返生香故鄉亦有梅花嶼招取詩魂詠夕陽

奉和賓谷巖使人日蜀岡探梅之作

無數繁枝帶雪開春風又到嶺頭梅客尋蜀阜探花去人  
爲歐公載酒來影照華鐙橫繡箔香啼翠羽漬青苔二分  
明月佳如許東閣琴尊悵未陪

句曲道中

華陽山翠裏幽徑入雲重斷石橫枯草流泉咽古松雪程  
緣坂騎煙寺隔湖鐘待訪陶貞白青山第幾峰

夜泊龍潭對月望華陽諸山殘雪皎然意境清曠蓬  
窗翦燭書寄湘姬

扁舟寂寞滯河干雪後江山月下看詩境清華應附鶴仙  
心縹緲欲驂鸞明燈深夜花初炮翠被中流夢未闌一樣  
梅花東閣裏有人扶病憶春寒

龍潭旅舍夜坐

龍安古驛隱層巒三五疎星夜向闌旅館潮聲燈下聽華  
陽山色月中看青衫憔悴憐司馬絳帳嬋娟憶采鸞記取

征人來日路秣陵煙樹又長干

重至秣陵題新刊秣陵集後

新詩賦罷寫吳綾又趁春風到秣陵一集宮商畱白石六  
朝興廢問紅藤年華已過高常侍壇坫虛稱杜少陵傳世  
祇應師白傅名山到處託禪僧

青溪雪夜聞歌

板橋楊柳靜棲鴉雪意溟濛暗畫紗珍重桃根與桃葉尊  
前解唱玉梅花

青溪流水繞朱闌簾外春陰動晚寒金屑琵琶玉鈿遂紅  
羅亭榭擁雙鸞

笑看紅兒勸玉卮閒凭翠袖寫烏絲唐花泥煞春屏影記

取燒燈夜譙時

惆悵絲繩提玉壺隔江商女話當壚分明太白當年事夜  
雪青溪聽鷓鴣

紫釵樓題壁

丁字簾前子夜歌銷魂第一是橫波燈前含睇初迴鳳鏡  
裏顰眉更斂蛾桃葉軒窗眠綠綺梅花亭榭羃紅羅俊遊  
記取芳春夕玉蘂飛香勸翠螺

金陵雜感

往事分明記蔣州江山如畫賦重遊坐來士女青綾障換  
到仙人紫綺裘春雨闌珊頻對酒夕陽凝望一登樓閒情  
消盡歸心動不賦驚鴻賦野鷗

過眼風花春夢婆此情何止感東坡殘山賸水吟難了乳  
燕雛鶯嫁已多有客驂鸞閒著錄幾家行馬息鳴珂祇應  
貰醉長千里東下江流送逝波

寓秦淮朱氏水閣二波騎尉從余譚讌累日極置酒  
燒燈之樂閣故無名因署雲波吟榭顏之以誌雪鴻  
蹤跡並系以詩

停雲水榭問如何往事分明一刹那又向天涯感風絮別  
開詩境署雲波唐花曲策春人酒燕玉琵琶雪夜歌他日  
板橋徵故事石城楊柳話婆娑

試燈夕雲波吟榭聽雨

板橋煙樹暮雲凝一曲青溪漾斷冰雪後紅樓纔露瓦雨

中珠箔又飄燈香生半臂寒初覺醉倚雙鬟酒不勝記取  
雲波新水榭銷魂佳詠在吳綾

秣陵江上書寄湘姬

玉樹新聲記夢華春風又放秣陵槎杜陵紫鳳畱詩社賀  
監金魚付酒家畫閣明粧擁桃葉紅船春色載梅花烏絲  
待續琵琶譜儘有香絃語鬢鴉

江上待潮夜宿紅船不寐感賦

新年節物最芳菲小住秦淮暫息機勝地山溫兼水軟美  
人燕瘦更環肥候潮江舫燈垂岬問渡津亭月映扉翠被  
春寒正惆悵高樓空憶片帆飛

曉至揚州

誰從天際識歸舟東下江聲日夜流一樹梅花一詞客曉  
乘殘月到揚州

奉和賓谷饒使春日遊焦山之作並寄借菴

新詩曾記碧紗籠又見春帆趁好風江寺遠吞潮影白海  
門初上日華紅南能白足傳燈古北顧青山對酒雄憶罷  
梅花憶詞客一菴松影梵王宮

原作

會 煥

仙人招我出樊籠暫得相從一御風春入船頭江始綠  
雨含樹杪月初紅山靈應笑客顏老潮勢還爭詩筆雄  
幸續清游陸東海

江淹有陸東海  
焦山讌集詩

却悲遺墨米南宮

寺壁

刻甲寅歲人日唱和詩  
王夢樓先生所書也



眞州道中見桃花

眞州古道夜溟濛無數天桃驛路東殘月已過仙掌路春風先到細腰宮舊家門巷垂楊碧新水河橋倒影紅憶到西泠油壁句蘇隄煙樹畫屏中

瓜洲澹河作

眞州浚後又瓜洲辛苦河防事未休路北張綱通岱石張綱在廣陵東從岱石湖入見太平寰宇記地當齊澹潞伊婁唐書齊澹潞伊婁潤州北距瓜步沙尾紆滙六十里舟多敗溺潞從漕路由京口埭治伊婁渠以達揚子揚州府志謂京口與伊婁相對避江行之險正今日浚舊遊袁浦登樓賦往事吳淞借箸籌更種金城幾河地也行柳他年安穩送歸舟

王漁洋有過眞州仙人掌弔柳耆卿墓詩今眞州無

、此地名論者議漁洋證古之疎蓋詩人本不以考訂  
見長也余春日道經甘泉山下林塚相望詢其地仙  
人掌也豈昔隸真州今隸甘泉耶問耆卿墓亦無有  
知者感而賦之

一代新詞有盛名井華會唱柳耆卿草堂誰寫花間集寒  
食人從塚畔行寂寞野花清露濕叢殘老樹斷雲橫羅裙  
也作飛灰散蛺蝶成團墮粉輕

題徐雪廬白鷗山房詩集

君詩如白鷗冰雪更雲霞杜甫唐天寶張翰晉永嘉寒聲  
驚獨雁異色表孤花落日松杉外清蒼自一家

清絕還幽絕飄然挂笠吟

挂笠吟  
卷尤勝

農桑隱君事山水古

人心渺渺空江遠  
惜惜月夜琴宵分  
人不寐傾耳有遺音  
新營書室落成自題一首

半生宦海與名場  
十笏經營署草堂  
坐看晚煙生曲徑  
臥聽春雨響長廊  
閒來小字臨東晉  
老去詩情愛晚唐  
暫捲疎簾待明月  
梅花吹滿讀書牀

寄西湖友人

從來宦隱判仙凡  
一角澄波映翠巖  
雲水定知鷗鳥侶  
煙江頻寄鯉魚函  
草堂高士梅花衲  
畫舫春人杏子衫  
正好清遊話  
嗟事羨他湖滌上輕帆

康山草堂雨中觀鶴舞

一鶴矯矯如遊龍  
延頸宛轉隨天風  
一鶴翩翩若驚鴻  
迴

身側翅盤虛空忽然對峙互引吭響透層嵐白雲上有時  
緩步蒼苔邊側身交讓仍迴旋一舞清泉移白石再舞青  
天飛白雪仙山髣髴雙青童綺衣羽裳各清絕鶴兮鶴兮  
爾何不棲青田之巖壑唳華亭之煙霄又何不隨蘇耽以  
飛翔伴林逋以遊翱胡爲悞墮塵網遭笱絜故山歸夢違  
林泉鮑昭舞鶴賦清適明心吾所讀周昉舞鶴圖三疊琴  
心誰所續山之巔兮水之涯故園昨夜梅花開仙之人兮  
遲爾回鶴兮鶴兮歸去來辛苦尊前折腰舞問鶴何爲鶴  
不語舞罷毵毵杳然去滿地松陰濕春雨

何如二首

松影菴中玩月梅花龕裏吟詩小作清涼居士何如煩惱

阿師

桃葉春波盡舫杏花疏雨朝煙刻意傷春傷別何如日午  
高眠

送人訪道

人間何處有蓬瀛辛苦求仙事遠征湖繞洞庭尋柳毅山  
環句曲禮茅盈萬重松影迷金闕一路桃花上玉京他日  
青冥降鸞鶴相期挹袂話長生

朝鮮國人金光寶輩八人泛海遇颶至閩遇救獲生  
資送歸國道出邗上已四月垂盡矣身猶褚衣長途  
觸暍非以矜恤遠人也爲製單衣襖並贈以巾扇香  
藥爲詩送之

曾經賊浪拍長空落日家山望海東逢我簿書邗水上憐  
君況瘁客途中衣裳略得清涼意藥餌還資變理功自是  
中朝重柔遠敬宣德意播

皇風

喜梅史至

江表聲名萬口傳相逢相別悵華顛行將遠道三千里已  
積離懷二十年幾度音塵虛入洛半生書劍悔遊燕期君  
早踐還山約各買湖西二頃田

答梅史見贈之作卽送之官畿輔會

詔營北直水利故次章及之

十年宦海感閒鷗江水江雲寄別愁五畝未營陶令宅一

官曾賦謝公樓湖山招隱畱佳約京洛論交憶舊遊倘過  
春明舊池館好題詩句寄南州

五雲宮闕鬱嵯峨比歲頻聞瓠子歌何事衆流橫渤海可  
無雙淀納渾河桑鄴以後遺書少燕趙之間故道多聞說  
至尊籌水利好將方略細編摩

原作

查揆

相對尊前未老身幾經灌漑此風塵虛傳張翰歸吳地  
尙想廉頗用趙人別後文章如瀚海聽來治行擬蒞輪  
玉杯繁露才何等多與先生作部民

司李風流或未如後堂吟事放衙初才餘蘇過斜川集  
論定班昭續漢書投老幾時耕下溟順行有客醉南徐

扁舟半載巾箱去奇絕滄江貫月餘

送卓上人還棲霞

青山處士廬幽徑入幽居殘磬暮雲合暝烟秋樹疎巖燈  
驚宿鳥潭月照行魚待拓唐碑字孤亭夜色虛

春夜泛舟虹橋並過倚虹園玩月

紅闌宛轉綠陰稠來向名園作雅游雨歇芳林花滿地月  
華靜夜水明樓兩頭簫管聞青雀四面琴尊酌白鷗絕似  
漁洋修禊日露桃烟柳滿芳洲

曉自蜀岡至虹橋園林花藥尙有存者隨意遊覽賦  
此寄意

蜀岡西下虹橋路幾處園林入翠微侵曉客來花徑靜饒



春人去酒船稀廣庭翠合風迴扇小謝紅香露濕衣似此  
清游聊自適竹陰閒看乳鶯飛

奉和賓谷齏使篠園觀芍藥原韻

樽前婪尾酒波頻吟到翻階句更新綽約人應憐夕秀韶  
華天遣殿餘春魏公詩翰紗籠換謝傅園林繡幔陳應有  
一枝金帶瑞他年相業問花神

原作

曾煥

落花風雨太頻頻今日湖天霽色新造物有心憐小草  
主人加力護餘春朱家二圃名猶在見王觀芍藥譜序坡老三  
過跡已陳手擘紅芳一惆悵當年刺繡費針神謂三朶花圖

廬山簡寂觀圖爲賓谷齏使作用原韻

處煩乃思簡處喧乃思寂我誦廬山謠境自匡君闢開先  
尋玉淵山深徑路圓其上橫九峰峰峰古苔積其下爲天  
池飛流白雲白倒挂三石梁直下二千尺何人慕元素坐  
此溪上石緬昔陸修靜茱萸解服食至今金陵岡隱居有  
遺跡南朝習輕浮甚苦塵囂逼行雲歸故山香茅棲絕壁  
石門訪仙觀雲泉猶可識我公澹蕩人宦轍感行役畫本  
烟雲供詩卷光陰惜舊隱漁竿寄健筆龍梭擲清遊赤壁  
簫高詠黃樓遂會得簡寂旨何處不自得三復謝公詩詩  
境如身歷

弔雲紅閣女史王仲蘭

女士名蘭修嘉定人光祿西莊先生女孫適長洲

吳氏年十八卒所著有曇紅閣筆記然脂錄二十

四妝世系圖皆論詩之作

雙鬟嬌小五銖寒別有靈心蘊蕙蘭四壁丹青環畫閣萬  
花紅翠擁詩壇跨來弄玉秦雙鳳歸去疎香葉小鸞二十

四妝俱絕世年來我已盛妝殘

以余詩  
比盛妝

芷秀新詞叩玉簪半生辛苦學春蠶多君點筆長凝黛媿  
我虛名竟出藍蟬鬢香銷花十八蛾眉暈淺月初三最憐  
一樹優曇影零落殘紅付佛龕

太原女史辛瑟嬋

絲

選

國朝詩品以余詩列上品

第十九人並以所製班管見貽賦此誌謝

麝月金星序玉臺春山重見選樓開彩鸞軒靜研香竟朱

鳥窗虛點筆，纔桃葉渡頭。雙漿去芙蓉，湖上兩鬟來。桓譚  
零落鍾嶸少，賸有蛾眉解愛才。

雲顰華髮步，後塵銖衣雲。祓悟前因可，無中禁呼才子畢。  
竟西方有美人，碧玉晉祠波。照影香姜齊，瓦硯生春更憐。  
楷法簪花好，翠羽明珠寫洛神。

玉天花海舊詩壇，知己生平憶蕊蘭。碧海書遙空附鶴，青  
山人去已驂鸞。祇今仙貌雲鬟在，又得烏絲翠墨看。絕似

昭容綠樓上，夜珠聲價倍高寒。  
長洲女史李晨蘭梁溪女史楊蕊淵皆曾選余詩

長安紫鳳翳詩名，珍重湘靈手製成。孝穆案頭雙管在，青

蓮夢裏一花生。十眉畫處螺痕淺，三品拈來繭紙平。更有

詩囊貽韞玉，海虞山畔翠樓橫。  
管刻紫鳳余長安舊日詩名也琴河女史屈宛仙曾

以白描百花詩囊見貽  
韞玉女史所居樓名

北湖阮氏祠觀重摹漢延熹西嶽華山廟碑

阮氏北湖祠祠中古碑二其一泰山碑秦篆廿九字其一  
漢延熹華嶽廟中置作者袁逢始成者孫瑋既東漢兩賢  
守有舉事無廢察書者郭香市石語相遞謂出蔡邕書始  
見古蹟記徐浩唐代人所見定非偽亦如岐陽鼓甲乙周  
宣次昌黎論定之衆喙息同異邕香本舊識事見靈臺議  
袁逢亦同時碑文集中識書碑矧擅長鴻都石經例所撰  
楊秉碑亦在延熹歲是碑同歲書邕也無疑義察書漢人  
語論者空詞費一千五百載雍時留帝系如何明中葉殘  
毀遭俗吏或云地震毀毀者誰所棄我意祠下石殘字定

埋瘞何年重出土顯晦關遭際不見玉女池秦碑出幽翳

此碑凡三本留重人間世一曰長垣本王氏藏明季王文孫鵬

冲國朝宋宋漫堂及陳陳伯恭崇本得寶藏歷世系成邸

今東平詒晉富藏弃厥本最完善懋同寶貴一曰華陰

本東東雲駒肇商雲郭郭伯允王王山張張力繼趙趙所

題跋石墨鐫欵誌流傳入黃山遂寶笥河笥黃星槎文蓮

得之以贈朱詰嗣能世守癸巳逮辛未至今椒花舫中夜

騰寶氣其一四明本豐豐南全全謝山所珍祕范氏天一

閣范懋七錄儲藏地嘉定錢宮詹潛挈更精粹我師親得

之琅嬛志嘉瑞雖缺百餘字筆畫最明麗昔年官京師高

會通贄幣三碑竟合并彷彿三峰峙雙鉤互校勘缺略始

頤道堂詩選卷十九

明脩勒之湖祠中照耀珠光媚我生慳墨綠考古夙有志  
幸得覩此刻漢儀補祠祭更考集靈宮存仙泝遺制上篆  
下通楷不數蘭亭禊彷彿郭書佐來察中郎隸古祠仰金  
天高城望白帝空迴渭水船未策函關騎卧觀索靖碑祠  
屋靜可憩會當攜榼羶拓待朝陽霽壁合與珠聯寶此雙  
碑儷

淨香園遺趾感舊

斜陽流水賸漁磯殘夢零星往事非紺殿香銷僧侶散玉  
山讌罷酒人稀斷垣有樹鴉爭宿荒徑無花蜨自飛證取  
眼前龍漢劫舊題詩處認苔衣

小忽雷歌

唐時琵琶大小忽雷名至文宗朝鄭中丞始顯事  
見樂府雜錄羯鼓錄今此器爲蓮龕方伯所藏有  
篆書小忽雷三字又有建中辛酉臣泚製進八字  
蓋德宗時韓滉轉運江淮所進也上刻孔東塘詩  
東塘曾撰小忽雷院本紀鄭中丞事則本爲東塘  
故物大忽雷舊爲楊鐵崖所藏見謝呂敬夫紅牙  
管歌序或亦尙在人間也臨川樂蓮裳有此作因  
和之

君不見大忽雷曾伴鐵崖吹鐵篴滄江泰娘拍紅牙一聲  
怒製龍門石君不見小忽雷何年流轉歸東塘金元院本  
久零落空餘扇底桃花香建中辛酉臣泚製轉運江淮五



城置德宗年號逮文宗五十年前舊題字浮花清渭漾魚  
醫中使春遊試按鷹一角紅牆閒佇立琵琶聲識鄭中丞  
鄭中丞汝本何方女何年入宮來宮中隸何所何年學琵  
琶曾否矚瑜習歌舞鄭中丞汝值深宮侍宵譙梨香按曲  
歸何院同時弟子知幾人曾否平明掃金殿鄭中丞何事  
輕干九重怒得毋法曲當筵誤冰紋三尺折紅棠錦衾付  
與東流去溫明秘器出宮中一角溝流御葉紅分明漢代  
樊通德來與伶元話故宮小忽雷宮庭理新曲檀槽雙鳳  
響迢遞四條絃上人如玉小忽雷曾向趙家修玉環舊製  
今何處太息風乾羯鼓樓小忽雷偶向梁家奏霓裳仙樂  
出人間萬花齊放春如繡小忽雷重到至尊前彷彿錦袍

出金鎖君恩成就今生緣我思忽雷名亦有壑雷義家在  
西泠飮空翠幾疊雲山靈隱寺疑坐春淙合澗橋滿耳龍  
泓語龍淵七客寮中詩社開海棠石壁掩春苔石梁夢醒  
天台瀑更憶當年大忽雷

蜀岡訪錢塘詩人潘雪江墓

雪江名問奇錢塘人工詩嘗北走大梁南之楚西  
入蜀還之京師弔昌平十三陵蓋桴亭侯齋之流  
也晚寓江都卒葬平山太守傅澤洪表其墓曰錢  
塘詩人潘雪江之墓詳陳定九留溪外傳

何年楠頌弔湘纍又向西山酌酒卮夜月無聲嘶石馬春  
陰如夢暗靈旗千秋陵墓孤臣淚一代興亡野老詩我亦

西泠舊詞客夕陽紅處讀殘碑

白雁吟哀凌志珍

志珍秣陵詩人凌芝泉女適旌德劉文瑤文瑤早  
卒珍矢志守節姑欲攜歸旌德珍聞其謀轉醮也  
乃畫白雁一幅題詩其上達之父迎歸病不食卒

翩翩雲中雁毛羽如霜雪鳴聲一何哀故雄中道別鸞悲  
鏡影孤鵠逝琴絃絕中夜姑惡啼音詭意殊譎影隻誓不  
羣羽弱氣轉決長吟思燕巢哀啼慘鵲血片楮寫幽貞坏  
土塋芳烈待題白雁銘玉鉤表殘碣湛湛寒潭水皎皎秋  
宵月

文魚館卽事

一枝紅影澹朝霞彷彿西施出若耶誰向水精簾下語荷  
花生日見荷花

蜀雪皚冬楚雨綿夏洪流併下江漲日增溢隄潰防  
田廬汨焉登天中塔望之

我登天中塔遠望長江水江水真州來一漲不可止河西  
十萬田汨沒洪波底昔日好屋廬今惟漾葭葦梵宇地勢  
高處處浮槎艤離宮麗金碧亦在明波裏河東一綫隄  
保障賴閭史瓜洲更東去江近圩岸圯鴻雁已無家魚龍  
爭入市灾黎十萬人灾區一百里蒿目徒愴懷徙倚日移  
晷願仗我佛力聊救斯民死衆生息苦惱我佛應歡喜孤  
坐佛無言殘陽下河溪

雨中江行

孤舟乘暮發烟樹暗溟濛瓜步秋陰裏焦山細雨中鐘聲  
催月上燈影隔江空夙夜嗟行役哀鳴徧地鴻

江上勘災夜泊焦山同借庵上人坐松寥閣聽雨

至人息群動勞生感行役江行阻急雨孤帆卸深夕夜叩  
贊公房韡泥踏陳迹上人吾舊雨詩老兼禪伯翦燭話近  
事關心共飢溺今年水災廣漫溢徧阡陌秋期兩大汎哀  
鴻困中澤所賴慈舟濟陸處得安宅粥飯分僧齋喁喁聚  
香積江水漲不消都作無家客至今溝中瘠住者猶千百  
蔣侯廷璣性好義指囷心不惜彈指兩月餘所費豈斗石我  
忝治邦江江海界肘腋上連眞州郭下亘崇沙脊無德能

消疹被潦若被疫瀕江百餘里廬畝汨潮汐灾黎十萬人  
哀鳴動心魄秋風日夜生處處單絺絺社穀殊寥寥發棠  
竟何益每遇秋濤發沿江急置驛出之洪流中連檣載廣  
船餅餌聊慰飢那得和肝膈秋成已無望但冀得種麥所  
慮漲不消積潦猶數尺太息蓬棲民何日安衽席况聞被  
水處隣境逮皖浙東南財賦地轉漕資擘畫不知當事者  
幾人同蹙額兩君非當局辛苦紆籌策矧我膺一官敢不  
圖保赤談深燭花短雙髻添新白雨止吾其行月出遠天  
白

以所著書付焦山書藏贈借庵

武林山下藏書處

謂靈隱書藏

回首西泠已廿年宦海蒼茫仍

故我名場蹤跡又殘編登臨湖寺還江寺香火前緣更後緣寄語東林賢長老一函珍重附琅嬛

乘月江行夜過圖山關

四更山吐月月在有無閒涼夢新秋夜江流第幾灣言辭焦阜寺直下圖山關滿耳淒鴻雁霜華兩鬢斑

佛感洲士民爲粥以饋飢者助之以米書寄柳村遜齋兩徵君

同蘊民胞志灾黎切痛癢僧厨分芋火農舫叩柴關莫使饕餮匱從知稼穡艱古人裘屨外寒士定歡顏

我媿司民牧疇咨敢憚勞發倉無汲黯爲食有黔敖香臠春匙滑醲流翠釜膏廉泉慚一勺吟罷首重搔

大水歎紀江北水災

西北沂江源東南竟江委巴蜀積雪深併作大江水今年  
楚雨多東下三千里邗江入海處處隄岸毀汪洋成巨  
浸地水本相比兼之潮汐盛浩瀚不可止屋廬與墳墓在  
在水中汎舟行不見岸惟見樹梢耳林鳥遠棲塔海魚近  
入市澤洞疑洪荒人民可知矣胥徒亟四出恤之錢及米  
紅船夾雙櫓渡人若渡蠟貧家葬近岸岸圯墳亦圯上下  
隨波流樁櫓相累累捐金爲瘞埋積棺若積儿子孫悉流  
亡悲啼雜人鬼老人八九旬自言未見此哀鴻徧中澤耳  
目忍聞視無德致災沴責躬惟自矢賑貸與蠲輸次第行  
就理更虞來年水奔騰復如是未雨須綢繆修防何日始



更期種來甦春熟聊救死老親疾孔亟灾民難未已息肩  
未可得中夜恒數起三復靡盬詩潛焉獨揮涕